

दिनांक 12.05.2025

समय: 18.48 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेन्द्र मोदी आज रात आठ बज्यां राष्ट्र ने सम्बोधित करेला।
- एयर ऑपरेशन महानिदेशक एयर मार्शल ए.के. भारती कह्या— भारत री लड़ाई आतंकवादियां अर उण रा सहयोगी ढांचा सूं है, ना कि पाकिस्तानी सेना सूं।
- प्रदेश रा सीमाडेरा जिलां मांय जनजीवन सामान्य व्हे रह्यो है—हनुमानगढ अर जोधपुर जिला मांय शिक्षण संस्थावां खोलबा रा आदेश जारी।

अर

- प्रदेश मांय पश्चिमी विक्षोभ रा असर सूं आज भी केई ठौड़ां माथे मेह बरस्यो—काल सूं पश्चिमी हलकां रा तापमान मांय बढ़ोतरी व्हे सके है।

000

प्रधानमंत्री नरेन्द्र मोदी आज रात आठ बज्या राष्ट्र ने सम्बोधित करेला। श्री मोदी रो यो संबोधन पहलगाम आतंकी हमला रे पाछे भारत रा ऑपरेशन सिंदूर रे पाछे व्हे रह्यो है। पहलगाम आतंकी हमला मांय 25 भारतीय अर एक नेपाली नागरिक मार्या गया हा। भारत जवाबी कार्रवाई मांय पाकिस्तान मांय केई आतंकी अर सैन्य संगठणा ने नष्ट कर्यो अर सौ सूं बत्ता आतंकी मार गिराया। इण सूं पैली दोपहर मांय प्रधानमंत्री नरेन्द्र मोदी नई दिल्ली मांय एक उच्च स्तरीय बैठक री अगुवाई करी। बैठक मांय केंद्रीय रक्षा मंत्री राजनाथ सिंह, विदेश मंत्री सुब्रह्मण्यनम जयशंकर, राष्ट्रीय सुरक्षा सलाहकार अजीत डोभाल, प्रमुख रक्षा अध्यक्ष जनरल अनिल चौहान, तीन्यू सशस्त्र बलां रा प्रमुख अर कई आला अहलकार शामिल व्हा।

000

एयर ऑपरेशन महानिदेशक एयर मार्शल ए.के. भारती कह्या के भारत री लड़ाई आतंकवादियां अर उण रा सहयोगी ढांचा सूं है, नी के पाकिस्तानी सेना सूं। ऑपरेशन सिंदूर रा बारा मांय दिल्ली मांय राख्खी एक प्रेस वार्ता मांय वणा बताया के ऑपरेशन सिंदूर रे दौरान सेना नागरिक अर सैन्य बुनियादी ढांचा ने किण भांत कम ऊं कम नुकसान पूगायो है। वणा भारतीय सशस्त्र बलां री एकीकृत वायु रक्षा प्रणालियां रा बारा मांय बताया के इण मांय सेना, नौसेना अर वायु सेना री रक्षा प्रणालियां भेळी है।।

प्रेस वार्ता ने सम्बोधित करता था कि डीजीएमओ लेफ्टिनेंट जनरल राजीव घई बताया कि भारत को एयर डिफेंस सिस्टम दुश्मन रा ड्रोन, लड़ाकू विमान अर मिसाइलें ने नाकाम कर्यो है। इण सू देश को कम ऊं कम नुकसान व्ह्यो। वे कह्यो कि भारतीय सशस्त्र बल इण खातर पूरी भांत तैयार हो।

डीजीएमओ श्री घई ऑपरेशन मांय इमदाद खातर बी.एस.एफ. री सरावणा करी। वे कह्यो कि ऑपरेशन सिंदूर रे दौरान तीन्यू सेनावां रे बीच पूरी तालमेल रह्यो। वे कह्यो कि सेना ने सरकार, महकमां एजेंसियां अर देश रा 140 करोड़ लोगों को पूरा समर्थन हो।

नौसेना संचालन महानिदेशक वाइस एडमिरल ए.एन. प्रमोद कह्यो कि नौसेना एक समग्र नेटवर्क बल रा रूप मांय काम करे है जो सगळा हलका सू होबा वाळा खतरां सू एक साथ निपट सके है।

वे कह्यो कि भारतीय नौसेना पहलगाम आतंकी घटना रे तुरंत पछे आप री मिसाइल रोधी अर विमान रोधी रक्षा क्षमता को प्रदर्शन कर्यो। वाइस एडमिरल प्रमोद कह्यो कि भारतीय नौसेना पाकिस्तानी हवाई हमला ने मकरान तट रे कन्ने काबू मांय रहबा ने मजबूर कर्यो जिण सू समुद्री हलका को खतरा टळ ग्यो।

000

भारत अर पाकिस्तान रे बीच संघर्ष विराम रे पाछे इण मीना री 15 तारीख ताई नागर विमान परिचालन खातर अस्थायी रूप ऊं बंद कर्यो गया 32 हवाई अड्डां ने अबे तत्काल प्रभाव ऊं खोल दियो गयो है। **भारतीय विमानपत्तन प्राधिकरण** एक बयान मांय यात्रियां ने सलाह दी है कि वे सीधा एयरलाइन सू उड़ान री स्थिति री जांच करे अर नियमित अपडेट खातर एयरलाइनों री वेबसाइट माथे निजर राखे। वठिने **राष्ट्रीय आपदा प्रबंधन प्राधिकरण** नागरिकां खातर सुझाव जारी कर्यो है कि कोई भी संदिग्ध वस्तु विस्फोटक व्हे सके है। उण ने हाथ नी लगाणो चाहिये, इण बाबत् एन.डी.एम.ए. कह्यो कि कोई भी संदिग्ध वस्तु मिले तो तुरंत स्थानीय अधिकारियों ने इण बाबत् सूचित करें।

000

केंद्र सरकार आप री ताजा ब्रीफिंग मांय पाकिस्तानी सेना रा दावा को भंडाफोड कर्यो है। पत्र सूचना कार्यालय री फ़ैक्ट चैक इकाई कह्यो कि पाकिस्तान साक्ष्य रा तौर माथे छेड़छाड़ वाळी फ़ुटेज दिखा र आप रा लोगों ने गुमराह कर रह्यो है। इण कठिन टेम मांय हर सूचना री जांच करबा री जरूरत है। इण टेम संदिग्ध सामग्री खास कर भारतीय सशस्त्र बल या मौजूदा हालता सू जुड़ी कोई दूजी सूचना दिखाई देवे तो उण बाबत् आप **पी.आई.बी. फ़ैक्ट चैक इकाई** ने सूचित कर सको हो। इण भांत री सामग्री ने **व्हाट्सएप नम्बर 8799711259** अर **ईमेल आईडी—शंभजबीमबा/चपइणहवअण्णद** माथे साझा कर सको हो।

000

प्रदेश रा सीमाडेर हलकां मांय पूरी सावचेती बरती जा री है। श्रीगंगानगर ज़िला अर उण रा चार उपखण्डां मांय सीमा सू सट्टा तीन किलोमीटर रा हलका मांय करड़ा प्रतिबंध लागू कर्यो गया है। अबे सिज्यां री सात बज्यां सू सुंवारे छः बज्यां ताई इण हलका मांय लोगों री आवा जाही पूरी भांत

बंद रहवेला। इण टेम खेती रा काम खातर भी अहलकारां सूं मंजूरी लेणी पड़ेला। अठे टॉर्च अर गाड़ियां री हेडलाइट रा इस्तेमाल माथे भी रोक है। सुरक्षा रे चालता बीकानेर, बाड़मेर अर श्रीगंगानगर जिला रा सीमाडेरा हलकां मांय बीती रात ब्लैकआउट रह्यो। जोधपुर अर हनुमानगढ़ जिलां मांय जिला प्रशासन आज शिक्षण संस्थावां मांय ऐलाण कर्या गया अवकाश रा आदेश ने पाछो ले लिया है। जैसलमेर मांय भी अबै हालात धीरे-धीरे सामान्य व्हे रह्या है। बाजारां मांय चहल-पहल निजर आ री है। बत्ती जाणकारी म्हाका खबरनवीस ऊं—

जोधपुर, किशनगढ़ अर बीकानेर एयरपोर्ट ने अबे दोबारां खोल दियो गयो है। एयरपोर्ट अहलकार यात्रियां सूं अरज करी है के वे आपरी फ्लाइट री जाणकारी संबंधित एयरलाइंस सूं लेवे।

000

मुख्यमंत्री भजनलाल शर्मा कह्या के जनता री समस्यावां रो हल काडणो राज्य सरकार रो पैलो काम है। सुशासन रा उच्चतम मानकां रे मुजब अहलकारी अर कर्मचारी आमजन री परिवेदनावां माथे कार्यवाही करे। श्री शर्मा आज जयपुर मांय आप रा रहवास माथे जनसुणवाई कर रह्या हा इण दौरान वणा आम जन री समस्यावां सुणी अर अहलकारां सूं वां रो बेगी हल काडबा ने कह्या।

000

आज बुद्ध पूर्णिमा है। गौतम बुद्ध रो जन्म अर परिनिर्वाण आज ही रे दिन व्ह्यो हो। वां ने बोधगया मांय महाबोधि वृक्ष रे नीचे निर्वाण मिल्यो हो। प्रधानमंत्री नरेन्द्र मोदी बुद्ध पूर्णिमा माथे देशवासियां ने शुभकामनावां देता थकां सोशल मीडिया पोस्ट मांय कह्या के सत्य, समानता अर सद्भाव रा सिद्धांतां माथे आधारित भगवान बुद्ध रो संदेश मानवता खातर मार्गदर्शक रह्यो है। श्री मोदी कह्या के त्याग अर तपस्या ने समर्पित भगवान बुद्ध रो जीवन विश्व समुदाय ने हमेशा करुणा अर शांति खातर प्रेरित करतो रहवेला। मुख्यमंत्री भजनलाल शर्मा अर विधानसभा अध्यक्ष वासुदेव देवनानी बुद्ध पूर्णिमा माथे प्रदेशवासियां ने शुभकामनावां दी। प्रदेश मांय वैशाख बुद्ध पूर्णिमा रो पर्व पारम्परिक सिरधाभाव सूं मनायो जा रह्यो है। सवाईमाधोपुर, हनुमानगढ़, चूरु समेत कई जिलां मांय इण मौके कई धार्मिक आयोजन कर्या जा रह्या है। वठिने आज बड़ी संख्या मांय ब्याव भी व्हे रह्या है।

000

प्रदेश मांय पश्चिमी विक्षोभ रा असर सूं कई ठौड़ां माथे आंधी चालबा रे सागे हल्को मेह बरसबा रो दौरा जारी है। भीलवाड़ा जिला मांय आज कई ठौड़ां माथे हल्को मेह बरस्यो। वठिने पाली जिला मांय कुछ एक ठौड़ां माथे मेह बरसबा रे सागे ओळा पड़्या। लारला चौबीस घंटां मांय राज्य मांय सब ऊं बत्तो 42 दशमलव 3 डिग्री सेल्सियस तापमान बीकानेर मांय दर्ज कर्यो गयो। मौसम केन्द्र जयपुर रे मुजब काल जयपुर, भरतपुर, अजमेर, कोटा अर उदयपुर संभागां मांय कठे-कठे मेह बरस सके है। मेहकमा रे मुजब काल सूं पश्चिमी राजस्थान री कुछ एक ठौड़ां माथे तापमान मांय 2 सूं 3 डिग्री सेल्सियस री बढ़ोतरी व्हे सके है।

000

आज अंतर्राष्ट्रीय नर्स दिवस है। ओ दिन आधुनिक नर्सिंग री जन्मदात्री फ्लोरेंस नाइटिंगेल रा जन्म रे मौके मनायो जावे है। अंतर्राष्ट्रीय नर्स परिषद हर बरस इण महताऊ दिवस ने मनावे है। इण बरस रो विषय है **“हमारी नर्सें, हमारा भविष्य—नर्सें की देखभाल अर्थव्यवस्था का सशक्तिकरण।”** इण मौके केंद्रीय स्वास्थ्य मंत्री जे.पी. नड्डा कह्या के नर्सा रो कल्याण सीधा तौर ऊं देश री स्वास्थ्य प्रणाली री मजबूती अर राष्ट्रीय विकास सूं जुड़्यो है।